

古今事文類聚

新集
十二之十三

~~90
75~~

逍遙文庫
文庫 6
28
75





新編古今事文類聚新集卷之十二

南江 富大用 時可 編

金陵 唐富春 子和 刊

六曹部

戶部尚書

歷代沿革戶部尚書周之地官卿也漢置尚書郎四人其一入主財帛委輸成帝置尚書五人其二曰民曹主入吏上尚書事後漢以民曹主繕脩功作當工官之任吳有戶部魏文帝置度支尚書等專掌軍國支計又置左民尚書晉初省別有度支皆主筭也惠帝時有右民尚書梁陳置左戶尚書並掌戶籍知工官之事後魏北齊有度支尚書後周置地官府太

事文類聚新集

卷之十二

德壽堂

司徒卿隋初有度支尚書則并後周民部之職開皇三年改
度支為民部唐因之貞觀改為戶部龍朔改為司元太常伯
光宅改地官尚書神龍復為戶部宋初除安壽為戶部尚書
元祐元年門下侍郎司馬光欲令戶部尚書兼領左右曹而
舊三司財用事有在五曹寺監者並歸戶部則利權歸一詔
尚書省立法左右曹錢穀尚書兼總使周知其數量入為出
而制國用元仍唐宋舊置戶部掌民籍貢賦官吏俸祿府庫
倉廩歲計支用權衡度量法式坑冶錢幣寶貨恩賜之事置
令史分掌名頭尚書為之長

羣書要語二曰地官其屬六十掌邦教周禮司民掌登萬民之
數自生齒以上皆書于版大司徒之職掌建邦土地之圖與

其人民之數以佐王安擾邦國以天下土地之圖周知九州之
地域廣輪之數而辨其邦國都鄙之數制其畿疆而溝封之
以會土之法辨五地之物生因此五物者民之常而施十有二
教焉同上司會主天下之大計計官之長若今尚書周禮注太
司徒齊戒受質以百官之成質於天子記王制司徒脩六禮以
節民性明七教以興民德齊八政以防淫一道德以同俗同上
帝曰契汝作司徒敬敷五教在寬書舜典農父若保酒醕司徒
掌邦教敷五典擾兆民周官穆王命君牙為周大司徒弘敷五
典式和民則君牙鄭武公父子並為周司徒善於其職詩緇衣
序祝鳩氏司徒也左傳地官理財能制於輕重唐太詔令崔羣
制掌司徒之邦教制民曹之地征綜事帥屬居其要會幹時通

才如可典領常集制 昔元凱之處斯職法司施行者五十餘條以資當時之急同上 虞書五教實委司徒之班周禮六卿爰開地官之位莫不織成都邑編緝氓黎設九土之網維成四方之管轄班固申大牙之制疆場綺分應璩論馬齒之規并由鱗次戶標九等俱陳萬國之圖人有十倫並掛三年之籍張鷟集注 西都賦曰疆場綺分又云原隰龍鱗之次應璩詩曰九州相錯雜相次如馬齒 九等攸辯百姓以親唐制 戶部之於中臺為周司徒之職南豐擬制 民曹上卿同上 序首曹於左輔歲奉類 宜參司會之職以裨經費之方同上 紫極八座非德莫居丹屏六曹惟賢是擇唐授李承嘉戶部尚書制 亦總地卿掌會計而經國紀綱式敘征賦益饒崔鉉制 及領地官且司邦賦會計事

劇出納孔殷投利刃而皆虛委焚絲而必理裴垣制

古今事實

明公展足

景雲中盧從愿為吏部侍郎杜暹注鄭縣尉後為戶部尚書盧自益州長史入朝杜立於上乃曰選人定何如盧曰亦由僕藻鑑遂使明公展千里足

內相預政

王琚佐明皇平內難為戶部尚書帝於琚眷委特異預大政事號內宰相並本傳

拜官令早

蔡景歷拜度支尚書舊式拜官在日午後景歷拜日適逢輿駕

幸玄武觀在位皆侍宴帝恐景歷不預特令早拜其見重如此

歲遷自擇

唐高宗以竇德玄舊臣自殿中少監為御史大夫歲中遷司元大常伯又任十餘人皆帝自擇

會要

在內七年

晉杜預在內七年損益萬機不可勝數朝野稱之

主計八年

唐王紹進戶部尚書眷待甚厚主計凡八年政事多咨訪紹亦未嘗一言漏於人

唐記

兄省許入

劉洽為御史中丞漑為左民尚書舊中丞不得入尚書下舍洽

引服親不應有礙刺省評決乃許入漑省亦以兄弟素篤不能相別也

從兄同榮

唐鄭善果為民部尚書制與裴寂等十人每奏事及侍立並令升殿與從兄元璿在其數時以為榮

分紀

張華王佐

張華為度支尚書有王佐之才

杜預武庫

杜預為度支尚書號杜武庫言無所不有

並本傳

祿給白衣

梁何胤為左民尚書後辭官隱于若耶山雲門寺勅給白衣尚

書祿循固辭

歸讓版使

韋煥辭判戶部歸謂甥姪曰已讓版使矣佳話錄

清儉不改

晉吳隱之為度支尚書以竹蓬為屏風坐無氈席後遷中領軍清儉不改每月所得祿總留身糧餘悉分賑親族本傳

清白自脩

劉溉為左良尚書溉美風儀善容止所至以清白自脩性又率儉不好聲色梁書

鄭有善績

唐鄭善果檢校大理卿兼民部尚書正身奉法甚有善績

崔有風望

崔從字子乂為戶部尚書為人嚴偉立朝稜稜有風望本傳

掌計何憂

魏文帝置度支尚書專掌軍國支計朝議以征討未息動須節量及明帝嗣位欲用安平王孚問左右曰有兄風否答曰似兒帝曰吾得司馬懿一人復何憂轉度支尚書晉安平王孚傳

備物置用

杜預為度支尚書內以利入外以救邊備物置用濟當時之益者五十餘條

儲義倉粟

長孫平開皇二年為度支尚書見天下州縣多罹水旱百姓不

類聚新集 卷之十一 五 使言堂料
給奏令民間每秋家出粟麥一石以下貧富為差等儲之間里
以備凶年名曰義倉隋書

掌戶口政

唐戶部尚書掌天下戶口井田之政令凡徭賦職貢之方經費
賙給之筭藏貨贏儲之數悉以咨之六典

改授刺史

唐太宗幸翠微宮授司農卿李緯民部尚書房元齡時在京城
留守會有自京師來者太宗問曰元齡聞李緯拜尚書如何對
曰但云李緯好鬚更無他語太宗遽改授緯潞州刺史
少息貧吏

宋朝李常字公擇號山房為戶部尚書常文士少吏幹或疑不

勝任以問司馬光光曰使此人掌邦計則天下知朝廷非急於
征利貪吏望風措克之患庶幾少息長編

作會稽錄

李常為戶部尚書作元祐會稽錄三十卷本傳

置裁省局

韓忠彥字師朴謚文定召為戶部尚書時元祐會稽錄初成入
狹而用廣忠彥憂之因言歛節財用遂裁省冗費置局於戶部
本傳

古今文集

雜著

讓地官尚書表

李嶠

唐文苑英華

無涯之恩。忽降霄極。非據之暢。坐驚魂宇。某中謝臣少無奇志。長乏異能。短步非疾。於驕驩。翺飛自同於燕雀。逢聖神之再造。屬天地之蕙容。鄭璞齊竿。竊混聲價。秦冠漢綬。叨踐名級。步駕池之清切。陟鸞渚之便蕃。出入五臺。周旋三閣。行膺負重之任。遂服專車之寵。萬機指益。蔽於庸陋之心。百揆謨猷。滯於膏肓之疾。爰發皇揆。特留宸眷。假優閑之秩。雖入杏壇。參翊亮之謀。尚和梅鼎。徒延丹楫之舉。竟微股肱之效。挈瓶之智。患在於空。虛瞰室之災。惧深於盈滿。方陳骸骨之請。遽荷雲霄之命。負乘之責。前詔未除。泰越之譏。後恩仍及。還振蜉蝣之羽。欲參龍鳳之行。赤紱妨賢。物知不可。素殮得位。臣亦胡顏。况八座樞機。五曹要劇。上儀七星之象。旁理萬邦之教。自非元凱之明。允忠肅。

陳韓之敦璞。淳深將何以釐。正版圖。擾安邦國。臣之淺狹。誠則貪叨。朝有典章。敢叨非望。伏乞回乾坤之曲澤。收雨露之殊私。廣訪訐謨。詳求棫樸。更引食場之彥。俾臨均土之司。則受任得材。無慙振鷺之美。官方有序。不失貫魚之次。

辭免除權戶部尚書狀

真德秀

文昌在從列。為最高版曹。於國計為甚重。自仲由之才。聖門僅許。以治千乘之賦。况如臣之不肖。而使攝太司徒之職。治天下之賦。其為不稱。亦已明矣。伏念臣曩負罪愆。眾所指目。保全覆燾。盡出聖君居間數歲。而予之祠奉。祠踰年。而畀之郡。甫及下。考透帥全閩。感激恩光。磨礪朽鈍。每思與悠久之利。不敢徇苟且之謀。私願朝廷假以歲月。庶幾斯人受一分之賜。少寬九重。

不忘遠之憂區區寸忱可以對越實無一念別觀寵榮豈圖到
官俶爾四月絲綸之命忽降自天仰惟陛下更化以來大明黜
陟英髦濟濟聚在闕庭臣於是豈不願親近日月之光遙跡鶴
鴻之列而自量蹇劣莫副選掄冒昧而前必致顛踣伏望聖慈
俯照忱悃收回渙汗用穆師言

再辭免戶部尚書狀

真德秀

需童有請渙汗未回讀溫詔之下寧重微衷之感激伏念臣雖
乏通明之識粗知去就之宜昔政在私門固合進難而退易今
權歸公室所當朝召而暮行矧惟去國之十年常切愛君之一
念每愁無路可輸畎畝之忠詎意逢辰重瞻天日之表身未離
於閩嶠心已驚於闕庭蓋即敬承敢云固避惟是天臺高選地

官劇曹位在納言難踵夔門之武職專治賦媿亡晏笑之才僭
瀆睿聰冀還宸渥或改司於閒局或仍綴於舊班庶幾上無濫
予之嫌器名增重下免僥逾之媿庶耻獲全

謝除戶部尚書表

真德秀

十連竊寵媿藩閩之罔功一札遄歸叨地官之進長班躡陪於
踐斗懼深重於履氷中謝伏念臣素守朴忠濫膺迪簡曩被初
元之召首躋通服之榮自退屏於山林寢逃違於軒陛憂時之
髮益白悵去國之十年戀闕之心為丹敢忘君於一飯屬蒙起
廢再玷承流皂蓋分符甞復既還於舊物青冥授鉞綉行仍忝
於故鄉曾坐席之未温忽賜環之已及方躬攬宏開於公道而
彙征必萃於群賢敢圖孤跡之漂流亦辱清朝之記錄且民部

周司徒之職豈惟稽戶口於版圖顧尚書古納言之官蓋實專
 喉舌之樞要誤拜演綸之澤冒陞曳履之華退省羸疲曷勝
 負茲益恭遇皇帝陛下乾剛天健蓄懿日新親庶政以厲精大
 明黜陟臨百官而昭德洞察忠邪念臣嘗參紫橐之聯知臣粗
 厲素絲之節輟還近綴俾待清光臣敢不期稱隆私勉堅初志
 生財有道雖漸源流本末之知事君勿欺願竭獻納論思之報

辭免戶部尚書狀

孫覲

竊以羣胡南牧大駕東巡奸雄奮臂而呼將士倒戈而至干官
 逃散萬室驚奔芻糧委於煨燼之餘金繒捐於寇盜之手理兩
 朝衰亂之緒仰繫上智之明振一時乏絕之憂當重計臣之選
 客有司之出納制萬貨之低昂孰能披軼於肯綮之間多多益

辯是宜審聽於音聲之際一一而吹選任或非其人誤國莫大
 於此如臣者本以簿書刀筆備藩宣之寄又以文章言語參侍
 從之華忽被詔除俾承人乏今廊廟禦戎之急惟兵民足食之
 先宜得命世經綸之才安用老生陳腐之說智有所不及其真
 操刀製錦之傷猶有所不為何預越俎代庖之事

戶部侍郎

歷代沿革隋煬帝始置民部侍郎唐因之後改為戶部龍朔二
 年改為司元少常伯咸亨元年復為戶部侍郎宋戶部之職
 皆歸三司元豐官制行戶部始總邦計置侍郎二員左曹五
 案戶口案稅賦案農田案檢法案知雜案右曹五案常平案
 免役案坑場案檢法案知雜案左曹除陳安石右曹除李定

紹興四年七月詔戶部侍郎二員通治左右曹職事以權吏

部侍郎劉岑有請故有是命元仍唐宋舊置戶部侍郎

羣書要語小司徒之職掌建邦之教法周禮地官之職邦教是

先必選國華以從人望韓退之除崔羣制下制民產上經國用

地官之貳實糸總焉南豐擬制往副民部孰知汝宜同上俾糸

版曹之繁初寮制君牙之貳歲表類地卿之貳爰委典司理財

先示於簡廉利物每懲其聚歛唐太詔令李絳周有地官小司

徒佐敷五教魏置度支尚書以濟軍國之用政有奈地然後庶

之常集授戶部侍郎專判度支制善其職者為登天任中茲選者

莫匪正人白集

古今事實

秩正貳卿

韋表微為中書舍人俄拜戶部侍郎職如故時自長慶寶曆國

家比多變故凡在翰林例無滿歲由是表微自監察六七年間

秩正貳卿備承恩渥盛于一時

進為宰相

唐戶部侍郎有二員判使按者別一署謂之左戶元和後選舉

莖重宰相多由此進崔羣既相孟簡代之大典

四十位郎

晉潘孟陽為戶部侍郎年未四十其母謂曰以爾之才而位丞

郎使吾憂之

三歷侍郎

唐文頴表所集

李元紘歷工兵吏三侍郎上令宰臣及公卿以下精擇堪為戶部者多有薦元紘者乃拜戶部侍郎元紘因條奏人間利害及時議得失以奏之上大悅因賜衣一副本傳

議戶版利病

楊瑒為戶侍郎帝召大臣議戶版瑒言利病甚詳帝次賞

敘歷代戶口

唐太宗問盧承慶歷代戶口多少之數承慶敘夏已後迄周隋皆有依據

獨無進獻

李絳為戶侍憲宗問曰戶部比有進獻至卿獨無何也絳曰將戶部錢進入內藏是用官物以求結私恩上嘉其直

不受納賂

唐牛僧孺拜戶部侍郎初韓弘入朝父子俱卒諸孤幼小穆宗命使閱其宅簿以付家老而簿上具納賂之所唯於僧孺官側朱書曰某月日送牛侍郎物若干不受穆宗按簿甚悅居無何議命相帝首可僧孺之名

計析秋毫

張平叔國之材臣也計能析秋毫吏畏如夏自司會逾月綱條甚張况師旅未息調食方急倚成取濟其爾而誰白君易除張平叔戶侍制

詔視財賦

潘孟陽權知戶部侍郎詔馳驛江淮視財賦孟陽持氣豪倨所至招金錢多補吏譽望大喪並唐書

開河疏諫

宋元祐五年主議者執開河減水之策戶部侍郎蘇轍上疏諫曰臣為戶曹右曹云戶部休戚計在此河若復緘默誰當言者惟斷在聖心盡罷其議

例外執奏

宋柳約字元禮權戶部侍郎感激奮厲悉力盡言凡例外宣索皆執奏以進周益公集

財用非長

王彥威開成初為戶部判度支彥威於儒該遠亦善吏事但經總財用出入米鹽非所長也

伏獵誤讀

蕭吳不知書嘗與嚴挺之稱伏臘為伏獵挺之曰省中豈容有伏獵侍郎乎乃出之本傳

自稱老奴

唐張平叔為戶部侍郎險太言因王播以進既掌財用常屈公利以便私嬖倖多狎之既有寵於上進退便僻雜以優誚或自稱老奴無復大臣之體

玩狎郎吏

嘗奏事畢降階復升上每笑容之在班列玩狎郎吏譁肆無忌摧鹽法請宰相為之使因自求樞機之任同上

古今文集

雜著

蘇文貞公集

太常少卿趙瞻可戶部侍郎誥

蘇軾

理財正辭禁民為非曰義先王之論理財也必繼之以正辭名
正而言順則財可得而理民可得而正自頃功利之臣言政而
不及化言利而不及義中外紛然朕益厭之具官趙瞻明於吏
事輔以經術忠義之節白首不衰爰自秩宗擢貳邦計將使四
方之人知予以著老舊德居此官者蓋有蓋徹之意焉

謝除戶部侍郎表

蘇子由

掖垣清閑奉鈇槩以媿安民部劇煩以金穀而為職事非素學
命不獲辭伏念臣起於南齊曾未再基擢在近班訖無少補開
口論事適宸心延納之初引筆代言非書命縱橫之際竊祿而
已功何足云計日以言時亦未幾方自憂於汰去豈復意於超

升此蓋伏遇太皇太后陛下仁聖無為靜深照物坐閱工師之
衆灼知情偽之端察臣朴愚憐臣孤遠才雖未能以應務性則
不喜於為邪試之劇曲真其來效然臣觀當今右部之政正值
昔日新法之餘召募憂於錢荒差繇患于戶少事既難辯法當
通方尚賴聖美之明稍寬民力之憊臣之疎拙徒自勉強苟少
緩於瘡痍亦圖報之萬一

再謝除戶部侍郎表

蘇子由

田野之姿入朝未幾侍從之貴冒寵已多方懷汰去之憂敢有
超遷之望中謝伏以右曹之政本專賦役之煩近歲以來復益
金倉之舊下關民力上計邦儲朝廷議論積年於茲吏民封章
繼日以上置局未遑於成法付部要責其奏功將以適四方之

宜爲一代之典自非精練吏事通知民情何以上副憂勤下寬
疲瘵如臣淺陋殆難克堪此蓋伏遇皇帝陛下聖貴乘時孝先
述志明於因革之故達於利病之源上覽祖宗之成規下采今
昔之公議昭然獨斷惠此小民謂臣出自賤寒或知劬農之意
性本愚拙庶無希合之情度越衆賢付以要務臣敢不上體聖
慮勉盡鄙心

與戶部鍾侍郎書

朱元晦

熹謹東向再拜致書侍郎執事熹昨得見於省戶下忽忽五年
中間來使閩部熹方退伏田里有俯仰出入之故雖不得瞻望
履寫之餘光亦嘗以章少卿丈所致書輒爲數字之記以通於
左右是後乃不敢有所關白不自知其果能達視聽否也此來

同安除秩簿書塵土中乃聞執事復爲天子出使巴蜀萬里之
外弛去通負絡錢之在官者以數百巨萬計再節來還天子嘉
之下所議奏於四方擢執事置尚書省郎以計辯曹二十四司
之治可謂寵且榮矣又以執事通於君民兩足之義俾執事攝
貳於版曹務以均財節用便安元元爲職除自既聞四方幽顯
無不悅喜以爲執事必能以所嘗施於蜀者惠綏此民寬其財
力之所不足以助天子仁厚清靜之政也今執事之蒞事數月
矣四方之聽未有所聞也熹不佞竊有所懷敢以請於下執蓋
喜聞之天子憫憐斯民之貧困未得其職故數下寬大詔書弛
民市征口美與逃賦役者之布又詔稅民毋會其踴贏以就成
數又詔遣執事使蜀弛其通負如前所陳者熹愚切以爲此皆

民所當輸官所當得制之有藝而取之有名者而猶一切蠲除不復顧計又出御府金錢以償有司是天子愛民之深而不以利爲利也明矣而况於民所不當輸官所不當得制之無藝而取之無名若所虧少經總制錢者乎熹以謂有能開口一言於上以天子愛民如此所宜朝奏而暮行也而公卿以下共事奸阿莫肯自竭盡以助聰明廣恩惠前日之爲戶部者又爲之變符檄急郵傳切責提刑提刑下之州州取辦於縣轉以相承急於星火奉行之官如通判事者利於賞典意外督趣無所不至此錢旣非經賦常入爲民所逋貫官吏所侵盜而以一歲偶多之數制爲定額責使償之自戶部四折而至於縣如轉圜於干仞之坂至其址而其勢窮矣縣將何取之不過巧爲科自以取

之於民耳而議者必且以爲朝廷督責官吏補發非有與於民也此又與盜鍾掩耳之見無異蓋其心非有所蔽而不知特籍此爲說誑誤朝聽耳計今天下州縣以此爲號而率取其民者無慮什之七八幸其猶有未至於此者則州日月使人持符來逮吏繫治撻擊以必得爲效縣吏不勝其苦日夜相與撻其長官以科率事不幸行之則官得其一吏得其二三並緣爲姦何所不有是則議者所謂督責官吏者乃所以深爲之地而重困天子所甚愛之民也夫吏依公以侵民又陽自解曰此朝廷所欲得非我曹過也夫愚民安知其所以然者何哉亦相聚而怨曰朝廷不恤我等耳嗚呼此豈民之所當輸官之所當得者蓋其制之無藝取之無名甚矣夫以天子之愛民如此彼所當輸

當得有藝而有名者猶一切出捐而無所吝况如此者惟其未
之知耳一有言焉其無不聽且從夫而獨愛其言者何哉是執
政任事之臣具天子也執事誠能深察而亟言之使所謂虧久
經總制錢者一白而罷去則州縣之吏無以藉其口而科率之
議寢矣然後堅明約束痛加繩治敢以科率病民者使民得自
言尚書省御史臺則昔之嘗為是者其罪亦無容矣於以上廣
仁厚清靜之風下副四方幽隱之望無使西南徼外巴賈叩花
之民夷獨受賜也豈不休哉喜疎遠之跡於執事有先君子之
好而亦嘗得一再見辱教誨焉今也適在此位為可言者誠不
自知其愚且賤思有補盛德之萬分故敢獻書以聞

律詩

送李戶部侍郎自河南尹再除本官 劉禹錫

昔年內署振雄辭今日東都結去思宮女猶傳洞簫賦國人先
錄衮衣詩華昌却復文昌位別鶴重歸太一池想到金門侍稱
藉一時驚喜見風儀

戶部郎中

歷代沿革 同官司徒屬官有下大夫蓋郎中之任也漢尚書郎

一人主力占墾田吳張温為戶曹郎魏有左民部曹有農部
郎中又為左人右人後又為人部人曹皆戶部也晉兼置右
民郎曹東晉及宋齊唯有民部曹梁陳為左戶曹郎後魏為
左戶曹郎北齊有左民郎曹隋初民部郎曹置侍郎二人煬
帝除侍字改民部郎為郎中高宗改為戶部龍朔為司元

大夫後復故郎中負外郎各二人掌戶口土田賦役貢獻蠲免優復媼婚繼嗣之事以男女之黃小中丁老為帳藉以求業口分園宅均其土田以租庸調歛其物以九等定天下之戶以為尚書侍郎之貳其後以諸行郎官判錢穀而戶部度支郎官失其職宋元豐改官制罷三司歸戶部左右曹而三司之名始泯矣舊三司使即尚書副使即侍郎權發遣副使即權侍郎三司判官推官及判子司官即郎中負外郎之任元仍唐宋舊置戶部郎中二人

羣書要語地官為郎杜牧行韋退之制郎官皆為清秩杜牧行韓賓制復以人曹郎佐掌邦計元微之行高允奉制參我地官之屬首於時俊之科類要

詩句負外由來美郎中望不復寧知粉署裏翻作土山頭唐趙諱光自大理正遷戶部郎中而負外郎賀茂嚴詠云

古今事實

家號郎官

唐韋維為郎嘗持柳于庭及憲兄弟居郎省對之輒歛容自叔謙後至郎中者數人世號郎官家

世上儒學

宋淳化中戶部郎中張郁父正仕至戶部郎中世尚儒學號書樓張家長編

戶部二妙

韋維字文紀為戶部郎中善裁剖時負外郎宋之間善詩故稱

事類彙編

戶部丁妙 詩話

正元十子

唐盧倫為戶部郎中有詩名於正元中與李端司空曙曙徒名為十才子形於圖畫以美其名同上

儒術風采

唐武儒術遷戶部郎論事有風采 本傳

王質方雅

唐王質為戶部郎中以方雅特立除諫議大夫 劉禹錫為神道碑

斷叔姪爭嫡

隋高構轉民部郎中時有叔姪爭嫡尚書省不能斷朝臣之議不決構斷而合理上以為能勞之曰我聞尚書郎中上應列宿

觀辨才識方之古人之言信矣嫡庶者禮教之所重我讀卿判數遍詞理愜當意所不能及也賜米百石由是知名 隋書

論宰相領度支

唐武儒術遷戶部郎時皇甫湜以宰相領度支剝下益上儒術上疏論列氣象高雅論事有風采 唐書

古今文集

雜著

戶部郎官廳壁記

施溫舒

國家分置六部各統其屬屬之所治各有攸司戶部之屬五其所治之事若民訟若賦役若供餽給賜若貨財出納若倉廩奏積雖各掌其一而書判之冗會計之勞符檄之多憂責累等也

中興以來五十年間凡同舍郎更代之姓名遷授之歲月漫不可攷淳熙五年今樞密同知謝公為左曹得二右為題名未就而遷御史既登西府諉同舍曰事求全則難成從簡則易就繇紹興至隆興遠矣典籍雖存非一朝所能討訂也姑舉關典豈若首隆興之元而序次之其所未備則後之博雅君子攷諸國史而詳焉必有任其責者同舍皆曰然於是乎刻之淳熙八年十一月記

戶部員外郎

歷代沿革周官司徒屬官有上士蓋今員外之任後周依焉隋開皇置民部員外郎煬帝改民曹承務郎唐改民部員外郎正觀明慶咸亨龍朔光宅神龍並隨曹改復員外郎二人從

六品上掌領天下州縣戶口之事凡天下十道任上所出而為貢賦之差分十道以總之宋尚書諸司郎中正七品元仍唐宋舊置戶部員外郎三人

羣書要語戶部員外郎掌戶口賦役貢獻蠲免優復婚嫁繼嗣之事唐百官志為尚書侍郎之貳同上

詩句錦帳隨時設金爐任意薰唯慙員外置不應列星文趙謙光酬賀涉詩

古今事實

泄事有聲

唐狄仁傑薦于光明為員外郎泄事有聲唐書

奏議第一

唐裴向累為樸陽渭南令秦議皆第一擢戶部員外郎

賞其清俊

唐戶部與吏部鄰司時吏部移樸令戶部列棘以備交通呂太
一為戶部員外郎答曰眷彼吏部銓總之司當須簡要清通何
必設籬樹棘時賞其清俊

異其進獻

唐張濬累轉度支員外郎黃巢將通關軸濬托疾請告侍其母
挈族避亂商州賊犯京師僖宗出幸逾年供須衛軍不得食漢
陰令李康獻榷餉數百驛軍士始得食僖宗召康問曰卿為縣
令安操心至此康對曰臣為塵吏敢有此進獻張濬員外指臣
也帝異之急召至行在拜兵部郎中

古今文集

律詩

送白敏中新授戶部員外郎西歸

白居易

千里歸程二伏天官新身健馬翩翩行衝赤日加餐飯上到青
雲穩着鞭

戶部分掌

金科

○舊金部

歷代沿革

周職金掌凡金玉錫石丹青之戒令漢置尚書郎四
人其一主財帛委輸蓋金部之任也魏晉宋齊後魏北齊並
有金部郎梁陳隋為侍郎唐龍朔中為司珍大夫咸亨復天
寶改司金郎中至德復舊建中初罷劉晏鹽鐵等使天下錢

穀委金部倉部中書門下揀兩司郎官准格式調掌尋復置
使^宋金部判司事一人以無職事朝官充凡庫藏出納之節
金寶財貨之用皆歸於三司而權衡度量之制主於太府寺
本司無所掌元豐官制行郎中負外郎始實行本司事初除
晁端彦參掌給納天下之泉幣計其歲所輸數歸於應受之
府藏以待邦國之用而鈎考平准市舶推易商稅香茶鹽禁
之數以周知其登耗凡造升斗尺秤皆以法頒其禁令若事
應諮決擬書者視度支分案七左藏右藏錢帛權易請給掌
法知雜案

元戶部令史分掌名頭有金料

羣書要語大寶曰位夏陳納貢之書聚人曰財漢有藏錢之府
莫不取之以道用之以時不役人以奉身不遣人以供國自鹿

臺重賦東夏為墟鴻都賣官西園成市張鷟集財用金穀有出
納之政權衡度量有制作之法司珍之任實典治焉南豐晁端
彦制郎史文昌之高選司珍民部之劇曹曲阜陳紘制司金劇
部命汝典之孫升制職金之任初察張輔之制

古今事實

主財帛輸委

漢置尚書郎四人其一主財帛輸委蓋金部郎曹之任也職林

掌庫藏出納

唐金部郎中掌庫藏出納之節金寶財貨之用權衡度量之制
皆總其文籍而頒其節制大典

盧自無愧

隋盧昌衡為僕射祖孝徵所薦遷金部郎孝徵曰吾用盧子均為尚書郎自謂無愧幽明矣隋書

蕭有父風

蕭頴士字茂挺終於揚州功曹子存字伯誠為金部員外郎諫直有功曹之風並唐書

對及治道

宋王師愈召除金部郎官數召對言事上孝宗時賜書曰比聞秦對頗及治道之具而未詳也尚有可裨政體而宜於今者亟復條奏其眷待之渥一時在廷之臣莫得望焉

不督虛籍

王師愈為金部郎戶部尚書揚俊取諸郡積逋緡錢七百萬付

金部使督之公曰此錢徒有名耳督之未必有得而文移一下所擾不知幾何人且中外一體若邦計未裕不若歸誠君父以幸寬免豈宜舉此虛籍以罔上而病民耶持其事不下

戶部分掌

倉科

○舊倉部

歷代沿革周地官有虞人下大夫為倉人司祿之長掌九穀之數賜賜蠲食以知足否蓋倉部之任也魏晉宋齊後魏北齊並有倉部郎中梁陳為侍郎並以度支領倉部後周地官府有司倉下大夫一人隋置倉部侍郎開皇二年改度支為民部領之唐因隋曰倉部郎龍朔二年改司庾大夫天寶中為司儲宋倉部判司事一人以無職事朝官充凡倉庾受納租

稅出給祿廩之事皆歸二司而別置提舉倉場官以督察本
司初除韓正彥建炎三年詔罷司農寺本寺諸倉場事務隸
倉部紹興三年復舊元戶部今史分掌名頭有倉科

羣書要語廩人掌九穀之數以待國之匪頒賜稍食以歲之
上下數邦國以知足否以詔穀用以治年之凶豐倉人掌粟
入之藏辨九穀之物以待邦用周禮出納必愆有司之常賦上
下之價則茫昧者受散雜苦良之貨則豪右者受贏惟一惟公
乃罔不同惟平惟實乃罔不吉元微之行苑季陸制歲漕東南
粟六百萬石以實中都故用命汝以廩人之職惟當於會計則
無曠爾官曲阜除王宗望制倉庾賦入之政祿廩賙助之法臺
郎典領列於右曹南豐除韓正彥制

古今事實

居部無言

唐昇緞為倉部郎中故事要家勢人部倉駕一部居之者不悅
織授之恬然如處美官無異言宰相知之遷職方郎中兼侍御
史知雜

為屬不附

孟簡為倉部員外郎王叔文為戶部侍郎簡為其屬中立正色
疑然不附並唐書

掌出納事

唐倉部郎中掌天儲庫出納租稅祿糧倉廩之事六典
掌給受事

宋倉部參掌國之倉場儲積及其給受之事列案有六倉場上供給納糶米掌法知雜神宗正史職官制

古今文集

律詩

送倉部蕭員外

韋應物

樸被蹉跎老江國情人邂逅此相逢不隨鴛鴦朝天去遥想蓬萊臺閣重

戶部分掌

內度科

外度科

○舊度支

歷代沿革漢有度支侍郎魏晉宋齊後魏北齊並有度支郎中梁陳隋為侍郎開皇三年改度支尚書為民部尚書始民部

領之唐

因馬龍朔二年改為司度大夫咸亨元年復故嘗不度國用租賦多少之數物產豐約之宜每歲計其所出而支其所用宋度支判司事一人列本案度支案發運案支供案賞賜案掌法案知雜案以無職事朝官充凡朝度之政皆歸

三司本司無所掌元豐官制行郎中員外郎始實行本司事初除陳向參掌計度天下之經費以貢賦租稅之入而為之出小事則擬畫大事則諮其長元戶部令史分掌名頭有內

外度科

羣書要語鳴鶴登朝含雞伏省轉筋之敏未見稱奇聚米之能無間播美張蒼之美善國用詎肯留情馮勤之攷計軍儲曾何介意年支國賦為政之嘉猷歲計軍儲邦家之要務位參計

會職緝度支

唐張鷟集

支度要部

胡文恭行盧成制

財物多寡

之數物生豐約之宜司度之曹典貳為重

南唐除陳向制

度支

掌支度國用租賦多少之數物產豐約之宜水陸道路之利每

歲計其所出而支其所用

六典

古今事實

自職度支

狄梁公以度支之司天下利害部常關入求之味得乃自職之

唐職林

始有副知

蘇弁授度支郎中副知度支事仍命立於正郎之首有副知之

名自蘇弁始也

六典

奏數千言

崔仁師為度支郎中嘗奏度支財物奏數千言手不執筆太宗

令杜正倫齋本與仁師對唱一無差殊太宗大奇之

判出入案

唐故事度支案郎中判入負外郎判出侍郎總統押案而已

奏理奪田

張仲方少朗秀父友高郵見而奇之曰此子非常必為國器後

為金州刺史郡人有田產為中人所奪仲方三疏奏聞竟理其

冤入為度支郎中

勅求杜若

正觀中勅下度支求杜若省郎以謝朓詩云芳洲采杜若芳貴

坊州貢之當時以為笑筆談

元理善美

曹元理善美回筋知二國之粟不差升斗也西京雜記

蕪類三曹

宋徐宗說在度支會右曹金部皆闕官因令蕪類三曹金穀織悉之地而宗說素有心計於天下經費出入盈縮之數莫不通知老吏為之歛手中興係年錄

古今文集

雜著

論度支疏

權德輿

十一月十二日將仕郎守右補闕臣權德輿謹昧死頓首上疏

皇帝陛下臣聞建官惟賢任人以器細大畢效輻輳無遺蓋就其所長以求至當古人所以有優於趙魏而劣於滕薛敗於粟邑而理於潁陽誠才各有所極也伏見司農少卿權判度支張延齡早以文學累居官次固而似守刻而少通徒有專勤之心且非適時之器往者貳太農之卿長司太倉之出納號為稱職蓋有恒規陛下急於獎能切於賞善權委邦賦冀有成績且度支所務至重量入為出從古所難使物無遺利而不可竭竭則害生類使奸無隱情而不可刻刻則傷人和調其盈虛制其損益上繫邦本下係元元苟非全才通識則有所難自延齡受任已近半載群議紛然皆曰非宜且權其輕重固與守之之才不同邊儲經費之功懋遠移用之法貴無留事以酌乎中簿領簡

書周行郡國失於毫釐利病相萬一物未理所軫皇情而延齡
 切於感恩昧於量功思有以效強所不通則有枉尺直尋之心
 多方自固之計吏伺其隙人售其奸因緣蒙蔽觸類滋長致遠
 恐泥學製實傷異時甚敗罪之何補伏料聖意久未正授延齡
 職名似觀其能否以為進退官司聞里衆口一心評議諠譁所
 不可遏伏望與一二宰臣時有裁議或詔問度支郎官使得以
 事實條對苟言者縲妄蓋有以辨之或才實未稱恐難久處儻
 擇能代命以他官以全延齡以便天下上副求理之意下遂陳
 力之宜則事任交脩職業不廢臣忝備陛下諫諍之官常服師
 訓緘默自負無以為容既嗣宗口不言人之短臣心常師之但
 以束帶立朝則異於是職當獻納豈敢顧身耳有所聞心有所

見義在無隱以奉聖明言而獲戾臣之必所不勝愚瞽悃款之
 至伏惟陛下裁擇

戶部分掌

舊屬糧料院

糧料院

轉運天下糧草急關規畫等事

歷代沿革 宋仍舊制以三司太將軍為都糧料使自開寶六年
 以著作佐郎陸光範充改用京官自此始太平興國五年分
 諸司馬軍步軍為三院八年以馬軍步軍合為一院雍熙四
 年命供奉官陳處晦勾當諸司糧料供奉官曾祚勾當馬步
 軍糧料自後復分馬步軍為兩院或以諸司使副分主之端
 拱二年復以京朝官主之元豐末併馬步軍與諸司為二院
 隸太府來掌以法式頒廩祿凡文武百官諸司諸軍奉料以

券準給中興以來行在諸軍諸司糧料院鎮江建康有分
差諸軍糧料院鄂州有分差戶部糧料院四川總所有分差
戶部魚關糧料院分差利州戶部糧料院六院官例以京官
知縣有政績者為之故思疏數畧視職事官而不入雜廩紹
興間胡汝明以料院除監察御史遂遷副端乾道復相繼入
臺者有宋敦書等數人而六院彌重號為察官儲美紹興間
復入雜廩淳熙間削去近歲復舉班在五寺簿下太學博士
上元戶部令史分掌名頭有糧草科

臺書要語宮正均其稍食又云月終則會其稍食周禮

古今事實

躬自檢校

宋汪大猷字仲嘉幹辦行在糧料院文書盈冗日不給視公間
摘一二無不切中老吏驚嘆謂未有也或言權貨務左藏庫有
羨儲朝旨以委公躬自檢校得其實以對樓文魏集

除太常簿

宋林正惠公大中字和叔幹辦詣司糧料院求外補同擬者四
人孝宗指公與計衡姓名曰此二人佳可除職事官遂除太常
寺簿同上

戶部分掌

舊屬審計院

歷代沿革宋以三司使總邦計司各有院以秉中外泉穀出入
之政蓋會計之府也然案牘叢委典者不能徧察而奸宄

審計科 審計天下見在錢帛可支年月

淳化二年始用戶部使禁知古奏別其冗籍復別為院置官領之以聽稍食之要貳置院之初特掌騎兵徒兵給受之數猶未及諸司也元豐三年合步騎兩院為一遂以其一主諸司上自宮禁朝廷下至軍食佐史凡賦祿者以式法審其名數而稽其辟召者唯效賜給已乃審祿有疑予則詔以法凡四方之計籍上於大農則逆其會凡有司議調度會賦出則詠焉設員二曰左右聽分案六史八人舊為諸軍諸司專勾司建炎元年改諸軍諸司審計官元戶部令史分掌名頭有

審計科

古今事實

以為關鍵

宋紹興五年臣寮言臣切惟國家之賦祿以糧審為關鍵糧審之勘給以法令為承式中興會要

不交權要

宋辛次膺監諸司審計司未嘗登權要門參知政事孟庶被詔薦其才遂召對是日除駕部員外郎胡澹庵集

古今文集

雜著

審計院廳壁記

吳博古

審計非古官也而原於古古者凡官府皆有要會而財用稍食之會尤詳國初以三司使總邦計司各有院以秉中外泉穀出入之政蓋會計之府也然案牘叢委典者不能徧察而姦容焉

淳化三年始用戶部使樊知古奏別其冗籍復別為院置官顯
領之以聽稍食之要貳置院之初特掌騎兵徒兵給受之數猶
未及諸司也元豐三年合步騎兩院為一遂以其一主諸司上
自禁朝廷下至半食佐史凡賦祿者以式法審其名數而稽
其辟名者唯效賜給已乃審祿有疑予則詔以法凡四方之計
籍上于大農則逆其會凡有司議調度會賦出則詎為設員一
曰左右聽分案大史八人然夷考縣官祿賜之費月長歲滋如
江河下流愈遠愈闊其浸淫未易隄障也自至道末歲給中都
官吏不過千數萬紙熙寧月四萬今又倍之百司吏祿又靡耗
特其蓋居兵費四之一豈據券涉筆者曾無秣於經費抑端本
澄源不在有司歟然糧糈為大農關鍵倘據會要而觀則倖等

必有隱蠹藏必有冗損益本末蓋可觀已院故無記前人名氏
不傳三山林君湜建安周君擘斷自南渡緒次官簿錄之石亦
不苟於其職夫故為書職掌大畧於其端以詗來者院舊曰專
勾中興避御嫌名更今名云淳熙十四年九月既望記

審計院題名記

吳傳古

秋九月諸司審計司作題名屬余為之記江陰呂君兼廬陵孫
君逢吉造余曰兩院皆君昔所洎寧獨遺其一也敢繼以請余
觀舊事自淳化綿絕之始以三班掌事後稍更用京朝官中興
選任尤寵善職者徑登郎省將使指近比非試邑有聞者不在
選中臺有缺屬於焉是擇士脫州縣登朝於焉問津其輕重視
胥何如而官是者昧焉不見姓名於後寧非缺歟諸君蒐補關

遺而余陳朽亦幸聯得書幸非幸歟顧併征余文將為兩院重
茲幸也寧非辱歟余曩嘗閱軍簿會兵費竊喟然嘆曰本邦維
財蠹財維兵觀本與蠹相盛衰益卽是焉觀之試挈一歲審放
之最錢以繕計糧以解計角以足計續以兩計者百二十有四
億僅足以贍中都之兵列戍三垂者不預焉秦漢以來雖或連
兵曠歲費不似此今塞言柔遠期與天下休養而無涯之費如
故民力安得不屈耶惟九重儉慈不以一毫妨經費曰民與兵
是恤是圖是以民無怨咨曰縣官所以征取於我者凡以衛我
也兵無缺望曰縣官所以衣食於我者極此固不薄於我也然
欲使兵絕虛籍國不徒費士得全廩師以不饑則任職者可不
閱民力之不易念官賦之難支悉意審覈以佐公家之萬一乎

汾華本末上卷與諸司同不復書姑以所嘗更者書以爲後遺
淳熙十四年十月四日記

新編古今事文類聚新集卷之十二

新編古今事文類聚新集卷之十二

新編古今事文類聚新集卷之十二

南江 富大用 時可 王編

金陵 唐富春 子和 刊

六曹部

禮部尚書

歷代沿革禮部尚書周之春官也漢成帝置尚書四人其四曰客曹主外國夷狄事光武分六曹吏部曹兼掌選舉齋祀事皆禮部也魏尚書有祠部曹東晉置祠部尚書掌廟祧之禮宋祠部尚書領祠部儀曹一曹齊梁陳皆有祠部尚書後魏稱儀曹尚書後周依周官置春官大宗伯卿隋為禮部尚書唐因之龍朔改為司禮太常伯咸亨復舊光宅為春官尚書

神龍復舊宋元豐正名始除尚書闕元祐六年以梁燾為禮部尚書元仍唐宋舊置禮部掌凡禮樂祠祭燕享貢舉釋道四方使客諸蕃進貢犒設帳設之事置令史分掌名頭以尚書為長

羣書要語

二曰春官其屬六十掌邦禮周禮宗伯掌邦禮治神

人和上下

書周官帝曰咨四岳有能典朕三禮舜命曰伯夷帝曰

俞咨伯汝作秩宗

夙夜惟寅直哉惟清舜典乃立春官宗伯使

師其屬而掌邦禮

以佐王和邦國周禮太宗伯之職掌建邦之

天神人鬼地祇之禮

以佐王建保邦國同上夏父弗忌為宗伯

左傳

宗伯秩禮是為太僚李絳制春曹尚書元稹行王播制禮

臣不佞

燕許公碑春官古卿是用授汝南豐擬制擢登宗伯之

曹上應文昌之位

晏公類要實在南宮之列晟表類典朕三禮

太舜委於姜夷分勅六卿

成王任於彤伯建茲歲首寔曰春官

敦敘九族之親欽若五常之教

祀天郊地之典舉其宏綱朝百

夕月之儀撮其機要

張鷟集昔舜命伯夷典禮后夔典樂至周

并為宗伯之任今禮部尚書蓋其任也

南豐擬制正禮闈以充

負眷惟千古之儀文宜付一時之雋彥

故從劇部移真清曹張錫制典禮之

於有司非人莫濟秩宗之於省戶其選則高

同上五星懸暉奉

池紫宮之典百官根本聯曹建禮之門

蕭子範表

詩句及乎貞觀初尚書踐台斗

注以王珪拜禮部尚書後以待

郎執政杜送王誦事

古今事實

管攝二曹

後魏孝文征馬圈留宋弁兼祠部尚書攝七兵事及行執事曰國之大事在祀與戎故令卿管攝二曹北史

授卿二職

唐高宗謂裴行儉曰卿文武兼資故授卿以一職即日拜禮部尚書兼檢校右衛大將軍

報卿直言

陳叔達初建成元苦疾害太宗陰行譖毀高祖惑其言將有貶責叔達固諫乃止太宗時拜禮部尚書勞之曰武德間公有直言故以報卿

召入決事

唐宗朝薛稷為禮部尚書以翊贊功每召入官中與決事恩絕羣臣

筮得鼎卦

李綱字文紀初仕隋官不進筮之得鼎卦筮人曰君當為卿輔待易姓乃如志至唐終禮部尚書唐書

藝如襪線

偽蜀韓昭仕為禮部尚書琴棋書射法悉皆涉獵李公轍曰韓公座仕藝如折襪線無一條長北史

沔善禮經

唐崔沔歷秘書監太子賓客既善禮經朝廷每有疑議皆取決

馬卒贈禮部尚書

稷議配饗

宋豐稷為禮部尚書哲宗升祔議功臣配饗稷以為當用司馬光曰公著或者謂一人得罪於哲宗廟或不可用稷曰止論其有功於時爾如唐五王配享中宗豈非得罪於中宗者哉通畧

止高麗市書

高麗貢使請買書籍朝廷以故事盡許之禮部尚書蘇軾言漢東王求諸子太史公書猶不許今可與乎詔曾經買者許依例同上

却西蕃貢馬

宋元祐西蕃有貢駿馬汗血者事下禮部軾時為宗伯判其狀

云朝廷方却走馬正復汗血亦何所用事遂寢蘇東坡三馬贊序

古今文集

雜著

禮部長貳碑記

洪邁

起建炎丁未至癸丑二十四年凡禮部侍郎尚書名氏可見者毋慮五十有八人其在事歲月若除舊拜新雜出於掌故省臆或脫不具然大畧在是矣自元豐定官制歸天下萬務於文昌曹分賦職頗采用周官唐六典尚書品第一侍郎品第二皆法從屬車間朝廷所以尊榮之甚寵由是得政者厲行立然要為具負吏朝日而坐出曹契治不過操觚視成振之以章程祝之以挈比思慮索於几案此其勢不能得施置自便獨宗伯不其然

間平時繩墨要會疑亦王官之一守有日天子舉遺興禮大朝聘太慶賀與天地宗廟典策秩享之事衆史贅聚閣筆詞不占措乃雍容風議斟酌故實援之古可驗揆之今可行者繫吾啓爲之非特規守成法視故府鍾鼓玉帛周章有司之後而已則上所選置正用第一品亦其理宜中興之宰十四而以是進者六故相國義陽公清河公江寧公吳興公今相國縉雲公弋陽公礪礪落落如乘倉龍騎北斗淵耀下飾燁然一時固宜登載表暴使後之君子有所瞻依新安金公乃命郎吏謹具年次書諸石紹興二十年九月初一日記

辭免禮部尚書兼翰苑奏狀

周必大

自天有命無地措躬臣竊惟掌禮代言班高選遴國初陶穀雖

嘗兼領然示伯猶是階官未率屬也元祐中獨蘇軾文章學問稱此兩職然亦先後迭居不聞並命自紹興至于乾道沈與求孫近胡交脩楊椿注應辰俱是六卿祗帶兼權學士有以見名器之重不輕畀付如此今臣至愚極陋無一可取積繇遭遇徧歷清華懷感恩之意而口不能宣堅報國之誠而力不能逮前此奏對每及祖宗時居內制者大率久任則臣拳拳之志粗亦可推第緣宿恙侵凌未免僥求閑散陛下海涵天覆已極隆寬乃復過有褒遷超視一品直兼翰苑度越前規寵厚而愈加位高而益進方聖主大開公路臨照百官何乃眷私小臣獨用其至此臣所以既懷滿盈之懼又慮仰玷聖明歷舉願天殆不容已伏望睿慈鑒臣悃悃非敢禮辭特頌詔且亟寢成命清資異

數留待奇才庶安危衷迄荷保全之賜

謝除禮部尚書兼翰林學士表 周必大

宗伯綴文昌之坐已高曳履之班翰林依華蓋之星尚玷縉綸
之直當聖主謹持於公器獨愚臣常愧於私人中謝臣竊考自
古豪英之才旋觀當今文學之士或抑厭草茅之下或陸沉州
縣之中瞻城南尺五之天致身無路想玉階方寸之地通籍幾
人况乎出入禁嚴周旋侍從論思獻納日過清光衣被服成歲
叨徽數向匪負一時之望安能符衆論之公如臣者學不足以
知方才不足以應務家壁四立耳為窮陋之民君門九重敢起
躋攀之念而自親逢聖作首奉詔除簡知特厚於衆臣獎擢徧
更於華貴官益崇而效寡祿愈富而報微左降固宜右遷何有

忽拜便蕃之命疊加優異之恩帥屬春官光貳卿之舊次摛文
禁苑奉四命之新榮煥寶帶以章身飾繡鞵而驚駭正使實兼
數器尚虞稱塞之難矧伊初乏寸長何意超踰之甚周革就列
俯仰懷軫此蓋伏遇皇帝陛下道叶舜華志恢禹迹明明在上
雖洞照於羣情浩浩其天每包涵於萬類寧稍捐於爵秩恐或
棄於菲葑遂致凡才亦塵顯仕臣敢不悉其思慮稱是寵優號
令文章期助漢家之制討論潤色勉晞鄭國之賢苟追素餐豈
驕洪造

禮部侍郎

歷代沿革 隋煬帝初置禮部侍郎 唐因之龍朔中為司禮少常

伯咸亨復舊掌策試貢舉及齋郎弘崇國子生等事舊制考

功負外郎典貢舉開元中李昂為進士李權所詆朝議以考
功位輕不足以臨多士次年遂以禮部侍郎掌焉宋元豐正
名除戶部侍郎謝景温為禮部侍郎自此始正除尚書闕元
仍唐宋舊置禮部侍郎

羣書要語

小宗伯之職掌建國之神位周禮禮部侍郎周之春

官小宗伯也六典

貳宗伯之掌禮典諸侯之貢士職類唐制可

使典禮以和神人禮記

可使考文以弟俊秀白集韋貫之制擢以公

望貳于秩宗豈惟神人之和職類唐制

且職類唐制秩亞春

官南豐擬制

稱秩元祀春官舊職舉秀與賢國朝兼領非文儒

碩茂裁鑒精實重于一時者不在此也職類

禮闈儀曹典郊祀

之禮獻賢能之書今小宗伯實兼

一事非直清公正者不足以

處之白集授韋貫之禮侍

詩句望即到處覺風生鄭谷和禮部盧侍郎

南宮吾故人白馬

金盤隨雄筆映千古見賢心靡他杜甫寄禮部賈侍郎

古今事實

侍郎入相

常衮自禮部侍郎入相時潘炎為舍人引麻因戲之曰留取破
麻鞋著及衮視事不決旬果拜南部新書

學士加榮

賀知章從太常少卿遷禮部侍郎兼授學士一日併謝訖謁宰
臣源侍中曰賀公久著盛名今日一時加一榮命竝為學士之
光輝雖欲學士與侍郎二者孰為美燕公曰侍郎自皇朝已來

為衣冠之華選自非履歷清要望實具美者無以居之雖然終是具身之吏又非往賢所慕學者懷先王之道為縉紳軌儀編揚班之詞彩兼遊夏之文學始可處之無愧一美之中此為愈也唐書

父子南省

崔挹子湜先是湜為兵部侍郎挹為禮部侍郎父子同為南省副貳有唐以來未有此事

兄弟禮部

崔氏兄弟六人邠鄆凡為禮部五吏部再居光德里構便齋宣宗曰邠一門孝友可為士族法因題曰德星堂後京兆民即其里為德星社並唐書

重於宰相

韋絕為禮部侍郎取士抑浮華先行實管從容奏曰禮部侍郎重於宰相帝曰侍郎是宰相除安得重曰然為陛下東宰相者得無重乎帝美其言

選多公卿

唐賈餗為中書舍人後正拜禮部侍郎所選士七十五人得其名人多至公卿

韋汝裁鑒

唐韋汝字啟卿為禮部侍郎於裁鑒尤長本傳

柳璟寬信

唐柳璟字德輝為禮部侍郎為人寬信好接士稱入之長遊於

門者他日皆顯於世

瑞柳試士

呂渭子君載遷禮部侍郎始中書省有古柳建中未枯文德宗自梁還復榮茂人以為瑞柳渭試進士取瑞柳為題帝聞而嘉之唐書

梯牆決事

惠文太子薨詔禮部選挽郎侍郎賀知章取捨非允為門蔭子弟喧訴盈庭知章於是以梯登牆首出決事時人咸嘆之舊唐書

直言時政

宋劉正夫字德初除禮部侍郎慧見詔求直言正夫條奏時政十餘事大略重名器輕賦歛戢干戈節賜予選人材惜民力鹽

祖宗成憲謹持盈守成之道徽宗嘉納之東都事畧

抗聲和議

宋禮部侍郎曾開知婺州先是秦檜語和議曰此事大係安危開於坐中抗聲曰丞相今日不當說安危正合論存亡爾檜覆然驚其言遂命出守中興繫年錄

不宜輕出

宋中丞張守諡文靖除禮部侍郎力辭不拜上命呂頤浩召至政事堂中諭以正人不宜輕去朝廷守乃受命中興係年錄

當專任用

宋張魏公復除知興元府已登舟除禮部侍郎召對便殿上慰勞宣諭曰朕將有為正欲一飛冲天而無羽翼者卿為朕留意

專文類集卷之十三
當專任用 朱晦庵集

古今文集

雜著

謝轉禮部侍郎表

范文正

渙渥自天，震惶無地。循墻弗獲，致寇是虞。中謝伏念臣布素寒
姿，斗筭微器。初縻下士之祿，忽塵上聖之知。歷升近班，嘗預大
政。深自感激，詎為因循。仰祖宗之謀，請行故事。懷社稷之計，動
發危言。雖欲必盡其心，奚能久安於位。遽彰無狀，誠合有誅。而
聖意始終，天慈曠蕩。尚宜名於秘殿，復蒙幸於善藩。天拙云藏，
人言用息。莫聞課最，敢覲龍光。伏蒙皇帝陛下，雷霆震威。日月
還照，未忘圖舊。不次推恩，擢登宗伯之曹。上應文身之緯，職命

如故爵數甚隆，徒執讓以弗諧。正服榮而為懼，臣敢不夕惕。三
省貢恭一心，進而盡憂國憂民之心。退則處樂天樂道之分。上
酬聖遇，用竭愚衷。

謝除禮部侍郎表

周必大

掌祕府之圖書，又玷英游之列。奉甘泉之筆，蒙驟汗法從之班。
恩厚踰涯，感深次骨。中謝臣聞知人，孫乎堯哲。分職著於周官，
明三德以有家。所以撫五辰而疑庶績，佐六卿而率屬。所以倡
九牧而阜兆民，何畏巧言其惟吉士。如臣者以介其疎之跡，
荷兩朝特達之知。槐市蓬山，早塵華選。烏臺鸞掖，浸陟要班。洎
中返於江湖，亦旋歸於覲闕。踰年于此，片善莫聞。心踧踖以不
安，顏忸怩而罔措。所期頭黜乃誤，殊遷惟宗伯古之清曹。惟貳

卿今之無仕禮樂自天子出雖上稟於聖謨遠旨則有司存當
 俯求於故實夫何鄙朴而許攝承夙夜直哉惟清莫遂夔龍之
 遜文章煥焉可述更斯乘馬之工茲蓋伏遇皇帝陛下冠古聰
 明御圖勤儉辨臣鄰之邪正昭示抑揚閱風俗之墮偷力加勸
 沮知臣雖無可用之實察臣粗有不欺之思特假寵榮俾陪亞
 族臣敢不益堅素守更厲丹心效守職之小忠詎塞論思之責
 竭事君之大節或酬覆燾之仁

辭免禮部侍郎兼直院兼侍讀狀

真德秀

內史之除倣逾三日秩宗之命遽下九夫仍經幄之新榮兼詞
 林之舊直此前代崇儒之典寂謂寵光矧嗣皇訪落之初可輕
 畀付顧如某者自視闕然禮樂詩書少雖涉獵文章翰墨久已

荒疎分閫二年憂民一意瘁痾由已敢辭夙夜之勞毫髮無功
 徒致陰陽之寇精神既憤形體支離頃屬夏秋之交嘗陳香火
 之請蒙恩未許竊慮是慚詎意龍飛首領驛召甫登西掖旋貳
 南宮陳善責難蓋平時之自詭專經好學迺盛旦之親逢所願
 依日月之光期或遂涓埃之補而某自嬰宿疾未底全安簡策
 舊文都忘前習記牋常語且出他人豈堪持衰憊之身而輒造
 清華之選仰祈敷奏俯狗愚衷祿賦祠庭庶少瘳狗馬之疾心
 存帝闕終願輸螻蟻之忠

謝除禮部侍郎兼直院兼侍讀表

前人

龍飛九五幸逢真主之興驛召再三俾造邇臣之列職親地遠
 恩鉅人微中謝臣竊惟國勢之重輕率視人材之聚散王多吉

士則若鳴鳳之集梧桐朝有直臣則若猛獸之衛藜藿和聲聞而妖聲自息正氣勝而邪氣罔干是以元祐首年盡起諸老隆興初政畢萃群賢正塗既開治象可卜於赫盛旦適邁先猷直得白首耆艾之英以重清時獻納之選伏念臣學雖志道材庸齷人忝乙第於慶元臨軒之初綴三館於嘉定改絃之始齷罪久直曾微華國之文螭陛屢前徒抱愛君之志越從持節海易守藩尚期宣室之席前忽痛鼎湖之弓墜義輪東出方薄海之仰瞻漢札西來先時髦而收召身未登於詞掖班已殫於儀曹金華玉堂假儒臣之榮寵蘭臺石室窺太史之秘藏自惟何人叨此殊獎茲益恭遇皇帝陛下德全純懿學務緝熙念皇天后土之監臨居懷兢畏察君子小人之消長實兆興衰謂臣雖無

通用之材知臣粗有不欺之節擢躋通服許負微忠臣敢不飛在苟容期於美報惟禮可以為國願廣晏嬰之言非道不敢前陳竊效孟軻之敬

律詩

寄王侍郎放榜

劉禹錫

禮闈新榜動長安九陌人人走馬看一日名聲徧天下滿城桃李屬春官

禮部郎中

歷代沿革周官太宰伯屬官下大夫蓋郎中之任也魏晉宋齊

梁陳後魏北齊有殿中郎儀曹郎殿中掌表疏儀曹掌吉凶禮制皆禮部郎中之職也後周依周官禮部曹置侍郎一

人煬帝改儀曹唐因之稱郎中武德二年復為禮部龍朔三年改司禮大夫光宅神龍曹改復元豐正名初除劉贊王子韶為之太朝會則上書奏藩國貢物凡慶賀若謝則郎中員外郎分撰表文建炎二年詔禮部郎官一員兼主客元仍唐宋舊置禮部郎中

羣書要語春官之屬晏公類要容臺是則僊闈咸推唐彭景直

禮部郎制儀曹之任實藉文雄郎吏之選必資時秀唐授禮部

郎制張燈起草譽動南宮許公集賜筆禮闈進席天臺之屬張

賈制裁書南閣常衮制大微之星郎位甚近宗伯之屬禮為司

清公是謝表俎豆之議者為典常歲奏之文傳為口實秩清任

重時儒所貴不次之用多此途出曲阜行上官均制儀曹郎選

參訂禮文兼職歲奏非富儒學未易處也同上堂佐尚書侍郎舉其儀制而辯其名數掌凡五禮之儀二百五十有二大典掌禮樂學校儀式制度衣冠符印表疏冊命祥瑞鋪設喪奠贈賻及官人等通典注

詩何惟此禮部公東坡也寒泉終舊井滴此又靡瓶召還及脩綱山谷須知百日掌絲綸禮部百日內馭知制黃故王元之典

古今事實

真儀曹郎

孔過為齊尚書儀曹郎屢歲闕禮多見信納上謂王俊曰孔過真所謂儀曹郎也南史齊書

鮮朝儀者

梁武帝問徐勉求一有學藝解朝儀者為尚書儀曹郎勉曰孔休源識見精通詳練故事帝即日除儀曹郎每建議訪問前事休源即以前所誦記隨機斷決曾無疑滯吏部任昉嘗謂之孔獨誦梁書

南宮舍人

舊說禮部郎中掌省中文翰謂之南宮舍人唐職林宋神宗與宰執議更官制至禮部郎中曰此南宮舍人非他曹比可除劉摯王鞏聞見錄

名表郎官

宋元豐官制禮部郎中謂之名表郎官別有印曰名表郎印石林燕語

辭章自名

唐薛稷字嗣通為禮部郎中以辭章自名論議無屈

唐李翱為禮部郎中性峭鯁論議無所屈見宰相李逢吉曰片其遺失並唐書

奏議詳雅

唐王宏中在禮部奏議詳雅省中服其能韓愈撰墓碑

大儀專委

唐劉杳字士深博綜羣書為儀曹郎僕射徐勉以臺閣大儀專委杳焉

止加尊號

唐王宏中在禮部奏議詳雅省中服其能

宋劉敞字原夫。天子將親太廟。丞相欲加上尊號。公以禮部兼領名表。丞相請撰表。公說止之。遂上疏章凡四。天子得公奏曰。我意本謂當如此。遂斷章表不受。公於是忤時相。言行錄

撰賜衣表

舊大朝會等賀及春秋謝賜衣。請上聽政之類。宰相率百官奉表。皆禮部郎官之職。太觀以後。朝廷慶賀事多。非常例。郎官不能得其意。蔡京乃命。中書舍人雜為之。既又不欲有所歸。於是間參取首尾。或摘其一二。聯次比成之。當時謂之集句表。禮部所撰。惟春秋兩謝賜衣表而已。石林燕語

古今文集

雜著

禮部郎官廳壁記

洪邁

鈞之為郎。然二十四司。公熱劇易。不得同。語中興時。捐不急之官。省郎員七。以主客。入於禮部。號為兩曹。而所掌猶不過。削印瑞郊。廟禮文。與士子科舉事。且所程判。其多不能以百。天明省門。開絲。大丞相以下。畢入聽治。吾同舍郎。南典選。北理財。文書鱗牛。吏四繞。不少置。獨儀曹之廷。可設。翳園。予方理。盡簡。呻帖。畢作書生。事業倦。則偃一榻上。遲食時。雙起。摩睡眼。以出。卒食。舒舒而行。伺丞相上馬。已即去。至無毫毛。可用以為勳。以白長官者。其官同。祿之入。又同。而佚勞相絕。顧如此。類之不厚。難矣哉。願壁當有記。以謹歲月。識名氏。今亡。有也。問諸掌固。掌固不知。蓋其官閑。其吏緩。閑與緩相遭。苟且頽靡。非一日實然。

予訪老吏質太史越數月而後頗得其梗槩乃探建炎以來至于今日自祖秀實始并書其幸甚云紹興二十年七月八日記

禮部郎官廳記

黃善若

紹興二十年洪內翰邁時作中興以來禮部郎官廳壁記自建炎元年六月至開禧二年四月由祖秀實而下凡八十七人題字竟及跌後來無以書今國子戴司業溪廼伐石以續而題其名於端屬余記歲凡于上惟禮部有議曹郎蓋古春官之屬魏齊及唐多選名士典領雖不洽又書比他曹為閑暇然極其至要則協禮樂以贊宗伯治神人以和上下至於事筆研於其間者亦必廉悍俊拔如柳宗元劉禹錫輩乃稱是豈細事思厥艱大反不若縱橫計財申乙論刑之為易易耳故廣前誌之末

黨方來之知勉使牽聯詩書業復光大以對于前聞人顧不律歎毋徒措睡睫曰丞相上馬去吾事畢矣開禧丁卯九月丙戌豫黃黃某記

朝奉郎蘇軾可守禮部郎中誥

王震

爾議論文章卓然名世而失職浸久所學未伸今茲命爾為郎以待不次之選孔子曰如或知爾則何以哉維爾之才不患無位

律詩

寄同年禮部趙郎中

鄭谷

仙步徐徐整羽衣，小儀澄澹轉中儀。樺飄紅燼趨朝路，蘭綻清香宿省時。彩筆煙霞供不足，綸闈鸞鳳訝來遲。自怜孤宦誰相

念禮祝空吟一首詩

寄禮部劉郎中

今狐楚

丁卯二年在土京仙垣終日選群英除書每下皆先看唯劉郎無姓名

禮部員外郎

歷代沿革

周官大宗伯屬官有士蓋今員外郎之任也後周

依焉

開皇六年置禮部員外郎煬帝改儀曹承務郎唐武

德初改禮部員外郎龍朔二年改司禮員外郎咸亨光宅神

龍隨置員外郎諸司員外郎正七品元仍唐宋舊置禮部員

外郎

禮部要語

官有秩清而選妙者其儀曹員外郎之謂乎 白集行

張元夫制

怒飛青冥翔集禁陛由茲去者十人九焉

同土

禮部

郎中員外郎凡講議制度損益儀物則審覆有司所上之狀以

次諮決而質於尚書省 宋續會要

詩句移石幾回敲廢印開箱何處送新圖

唐舊說○員外郎廳

有大石諸州府納廢印皆於石上碎之又圖寫祥瑞亦員郎所掌

古今事實

瑞錦窠

唐舊說員外郎為瑞錦窠 退朝錄

清廟器

以下係員外郎

唐李班為殿中侍御史宰相韋處厚曰清廟之器豈擊搏林乎除禮部員外郎

唐李班為殿中侍御史宰相韋處厚曰清廟之器豈擊搏林乎

除禮部員外郎

唐李班為殿中侍御史宰相韋處厚曰清廟之器豈擊搏林乎

文章稱首

唐劉禹錫柳文序子厚以文章稱首入為尚書禮部員外郎又
柳子厚文章卓偉精緻職林

撰定咸服

唐李叔夏授禮部員外郎則天將享明堂受制與當時大儒撰
定儀注眾咸推服之唐書

少年趨取

僕年二十三其少年自御史裏行得禮部員外郎趨取顯美柳宗元與蕭俛書

十年方轉

唐劉禹錫為禮部員外郎方與日者從容段文昌入謁既去日

者謂禹錫曰員外須待十年之後此客入相方轉正曹郎耳自
是禹錫決意連受外官十餘年文昌入相方除禹錫禮部郎中
錄異記

名德為首

唐崔澹舉止秀峙謂玉而冠者為禮部員外郎當時士夫以流
品相尚惟名德者為之首唐書

士林稱誦

宋汪大猷字仲嘉除禮部員外郎南宮名表一出士林稱誦之
樓攻愧集

不許補館

唐許孟容德宗召為禮部員外郎有公主之子請補弘文館諸

生孟容舉公式不許公主許于上命中使問狀孟容執奏竟得遷本曹郎中

不草虜牋

宋吳懋晉陵人為禮部員外郎虜立張邦昌法當節草牋奏公度不可拒將引繩自裁有幸非常者僂曰僕請為之由是獲免而王時雍用事坐政事堂公發憤罵時雍曰反虜吾不能擊汝如段秀實耶時雍面頰發赤不能對公因以疾求罷不聽遂稱疾篤於家 中興係年錄汪藻撰墓誌

論明堂合祭

宋王居正字剛中紹興元年除禮部員外郎上將祀明堂公立議請合祭天地奉太祖太宗配詔禮部議定撫州守臣言其露

降圖以聞公請卻其圖勿內臺臣繼劾守奪其州 日東萊文集

言海濱祭典

宋李文簡公壽正除禮部員外郎中興祭典未備兵鎮海濱先農先蠶風雨雷師九祠以酒脯代牲牢雨暘失節郡國水災以此詔復舊

古今文集

律詩

春夕伴同年禮部趙員外直署

鄭谷

錦帳名郎重錦科清宵寓直縱吟哦水含玉鏡春寒在粉傳仙闈月色多視草郎應歸屬望握蘭知道暫經過流鶯百轉和殘漏猶把芳樽藉露莎

禮部分掌

祠祭

燕享

山陵致祭

司天

醫卜

釋道

度牒

忌辰

廟諱

旌表

○舊祠部

歷代沿革東晉而下逮於北齊皆有祠部郎後周春官府有典祠中大夫隋有祠部郎唐改為郎中龍朔中改為司禋大夫後復故宋祠部判司事一人以無職事朝官充凡祠祀享祭皆隸太常禮院而天文刻漏歸於司天監本司但掌祠祭書日休暇令受諸州僧尼道士女官重行之籍給剃度受戒文牒而已元豐改制郎中員外始實行本司事祭掌天下典祀國忌廟諱凡本司所治之事月奏祠祭書日及休假令節即神祠封爵號則覆太常所定以上尚書省應官觀寺院僧道

置籍書其名額歲較醫官功過而賞罰之元無專曹官以令史分名頭掌之

羣書要語祭以祀神人道之極也祠曹所領體莫重焉夫南豐趙

令樂制追建禮之禮曹明文恭贈曹旭制水藤素號無事紹興

日本中制

詩句又隨急詔朝失去陳後山悲鄭祠部仰承宗廟懷祗虔晉

祠部稽合臺中宴會

古今事實

三世為郎

賀德基世傳禮學祖文發父淹至德基二世為祠部郎德基於禮記稱為精明甫史

二年在部

宋葉夢得字少蘊遷祠部員外郎召對上喜因問在祠部幾時對行及二年上曰如是久乎朕即當不次擢卿後數日遂除起居郎長編

召拜祠部

晉周捨博學尤精義理善誦詩書吏部尚書范雲重其才器言之梁武帝召拜尚書祠部郎禮儀損益多自捨出也

命陟典祠

宋富弼子紹庭除祠部員外制云惟爾先正相子祖宗爾少長義方習以成性詩不云乎惟其有之是以似之朕亦何愛典祠之清選而命汝陟焉以勸夫孝於親者往其欽哉東都事畧

呼為水廳

祠部呼為水廳夫声言其清且冷也因話錄

不博都門

唐省中語後行祠屯不博中行都門同上

言南北郊

魏徐邈為祀部上言南北郊及論明堂宗廟毀建言皆有證魏志

職太廟事

晉改立太廟肇虞為祠部郎職其事職類

才應禮樂

晉許允之字之奇才應禮樂擢為祠部郎同上

議有故實

後魏裴脩蕪祠部曹每有疑議撰斟酌咸有故實北史

不度僧道

宋陳襄字述古號古靈先生判尚書祠部時譯經僧法護遺表度十僧趙槩奏列于廟二年度道士襄皆執奏不行神宗實錄

不阿秦檜

宋胡寧文定之子遷祠部員外與秦檜議論不合時煇為樞密檜問兒子近除如何寧曰外議以公相必不與蔡京之迹檜怒以言童寵紹興正論

論樂舞非古

姚察為尚書祠部員外舊魏王肅奏祀天地設官懸之樂八佾之舞至梁武帝以為事人禮終事神禮簡古無官懸之交陳初

承用莫有損益晉帝欲備樂付有司正儀以梁武為非時碩學名儒咸希言察乃博引經籍獨違群議據梁樂為是當時莫不歎服

引經論薦新

趙彥若遷祠部員外郎先是宗廟薦新仲秋用菱萌未經易以蒲白彥若曰蒲春始生可食秋則過時不可以薦乃據引經傳政從春薦國史

古今文集

雜著

與祠部陸員外書

韓愈

執事好賢樂善孜孜以薦進良士明白是非為已任方今天下

一人而已愈之獲幸於左右其足迹接於門墻之間陞乎堂而
望乎室者亦將一十年于今矣念慮所及輒欲不自疑外竭其愚
而道其忠况在執事之所孜孜爲已任者得不少助而張之乎
誠不自識其言之可采與否其事則小人之事君子盡心之道
也天下之事不可遽數又執事之志或有待而爲未敢一二言
也今但言其最近而切者爾執事之與司貢士者相知誠深矣
彼之所望於執事執事之所以待乎彼者可謂至而無間疑矣
彼之職在乎得人執事之志在乎進賢如得其人而授之所謂
兩得其求順乎其必從也執事之知人其亦博矣夫子之言曰
舉爾所知然則愈之知者亦可言已文章之尤者有侯喜者侯
雲長者喜之家在開元中衣冠而朝者兄弟五六人及喜之父

仕不達棄官而歸喜率兄弟操耒耜而耕于野地薄而賦多不
足以養其親則以其耕之暇讀書而爲文以干於有位者而取
足焉喜之文章學西京而爲也舉進士十五年矣雲長之文
執事所自知其爲久淳重方實可任以事其文與喜相上下有
劉述古者其文長於爲詩文麗而思深當今舉於禮部者其詩
無與爲比而又工於應主司之試其爲人溫良誠信無邪佞詐
矣之心強志而婉容和平而有立其趨事靜以敏著美名而負
屈稱者其日已久矣有韋群王京兆之從子其文有可取者其
進而未止者也其爲人賢而有材志剛而氣和樂於薦賢爲善
其在家無子弟之過居京兆之側遇事輒爭不從其令而從其
義求子弟之賢而能業其家者群王是也凡此四子皆可以當

執事者首薦而極論者主司疑焉則以辭之問焉則以告之未
知焉則殷勤而語之期乎有成而後止可也有沈杞者張乾者
尉遲汾者李紳者張後餘者李翊者或文或行皆出群之才也
凡此數子與之足以取不望得才實主司疑焉則與辭之問焉
則以對之廣求焉則以告之可也往者陸相公可貢士考文章
其詳愈時亦幸在得中而未知陸之得人也其後一二年所與
及第者皆赫然有聲原其所以亦由梁補闕肅王郎中礎佐之
梁舉八人無有失者其餘則王皆與謀焉陸相之考文章甚詳
也待梁與主如此不疑也梁與主舉人如此之當也至今以為
策談自後主司不能信人人亦無足信者故蔑然無聞今執事
之與司貢士者有相信之資謀行之道惜乎其不可失也方公

在朝廷者多以遊燕娛樂為事獨執事眈然高舉有深思慮
為國家樹根本之道宜乎小子之以此言聞於左右也

禮部分堂

四方使客

○舊主客

歷代沿革 主客之職周有之漢置尚書郎四人其一主匈奴單
于蕃部蓋主客之任也魏有南主客曹主客分左右南北宋
置主客省皆因之隋為主客郎大業改司蕃郎文帝置主
客員外郎煬帝為承務郎唐龍朔改司蕃大夫宋主客無所
掌建炎三年詔禮部郎官一員兼主客掌諸蕃國朝貢及國
信禮物并封襲祭享之事元今史分掌名頭四方使客隸於

禮部

古今事實

起家為郎

後漢何遜少有美望，公府中十辟，一無所就。此是名重華夏起家為尚書主客郎。

主客稱職

後魏李縉為尚書南主客郎，縉前後接對凡十八人，頗為稱職。

庾對魏使

庾亮之為主客郎，對魏使使問亮之曰：百姓那家題門帖賣宅？答曰：朝廷欲掃蕩京洛，克復神州，所以家家賣宅。魏使縮鼻而不答。南史

范接北使

梁范曄為國子博士，有口辯，嘗兼主客郎，應接北使。

美其醞藉

匈奴使李道固至，詔使主客郎范岫等接對。道固等美其醞藉。齊春秋

囚其失言

魏收為主客郎，接梁使謝瑛。徐陵時為散騎常侍，使魏魏人投館，宴賓是日甚熱。主客魏收嘲徐陵曰：公白之熱由徐常侍來。陵即答曰：昔王肅至此為魏始制禮儀，今我來聘，使卿復知寒暑。收大慙。齊文襄為相，以收失言囚之數日。

古今文集

古詩

事文類聚

寄主客張郎中

姚合

年長方慕道金丹事參差故園歸未得秋風思難持
寒拙公府棄朴靜高人知以我齊杖履昏旭詎相離
吟詩紅葉寺對酒黃菊籬所賞未及畢後遊良有期
粲粲華省步眉眉旅客姿未同山中去固當殊路岐

律詩

寄主客劉郎中

姚合

漢朝共許賈生賢遷謫還應是宿緣仰德多時方會面
拜兄何暇更論年嵩山晴色來城裏落水寒光出岸邊
清景早朝吟屢思題詩應費幾州錢

寄主客員外郎

姚合

蟬稀蟲唧唧露重思悠悠靜者多便夜
夢家不見秋同歸方欲就微恙幾時瘳
今日滄江上何人理釣舟

新編古今事文類聚新集卷之十三

終

早稲田大学図書館

011488554214